

ALAKAMISY MASINA - TAONA A



Dia fara fitiavana no nataony taminy.

Ry Kristianina havana, tamin'ny Alahadin'ny sampankazo dia nankalaza ny fidiran'i Jesoa tao Jerosalema isika izay manambara koa fa miditra amin'ny fainantsika i Jesoa, mpiara-belona amintsika Izy ary izay no halalanintsika amin'izao taonan'ny fandalaninam-pinoana iainantsika ato amin'ny diosezy izao : *Jesoa miara-dàlana sy mpiara-belona amintsika, miditra amin'ny fainantsika.* Ny Alakamisy masina no ankalazaintsika androany, maro ny tandindona na "symbole", famantarana amboarina sy aseho ho entintsika miaina an'izany bebe kokoa, tsy hoe manao teatra isika fa araky ny fampianaran'i Jesoa androany izay naverin'i Md Paoly ny Teniny manao hoe : "Ataovy zao ho fahatsiarovana ahy".

Sady mahatsiaro ny fotoan-dehibe nihaonan'i Jesoa tamin'ny mpianany izay andro mialoha ny namantsihana azy isika androany no miaina ireo fihetsika sy famantarana maro isan-karazany niainan'i Jesoa tamin'io andro Alakamisy masina io. Ohatra azontsika ambara mivaingana ny fanontaniana apetraka amin'izay mpitarika ny sorona masina mikasika ny otely : *maninona isaky ny mankalaza ny sorona masina andavanandro isika dia efa voaomana ny otely nefà amin'ny andron'ny Alakamisy masina kosa efa tafavory ny olona rehetra izay vao manamboatra ny otely, izany hoe iarahan'ny rehetra ny manatanteraka ny fanomanana ny otely ? Izany dia fanehoantsika fa*

Vakiteny I : Eks. 12, 1-8, 11-14

Tononkira : Sal. 115,

Vakiteny II : 1 Kôr. 11, 23-26

Evanjely : Jo. 13, 1-15

miombona tokoa sady miditra amin'ny fiainantsika i Jesoa ilay mpanavotra sy mpiara-belona amintsik isika.

Tsara ny fanarahana tsara izay rehetra tokony ho tanterahina amin'izao Alakamisy masina izao satria hamelona antsika amin'ilay fotoan-dehibe iombonantsika amin'i Jesoa izay nanolotra ny ainy ho antsika. Ny nataon'i Jesoa tamin'ny Alakamisy masina dia misantatra sahady ary efa mampivelona ny mpianatra ny famonjena nataony teo amin'ny hazofijaliana. Ny teny nambaran'i Jesoa sy ny nataony tamin'ny Alakamisy masina dia nivelomany tamin'ny Zoma masina ka mampitohy antsika amin'ny Asabotsy masina izay fitsanganan-ko velona mitondra ilay famonjena izay hahatonga antsika ho zanak'Andriamanitra. Tanteraka ilay fampihavanana, tanteraka ilay fiombonam-pitiavana izay nanirahana azy avy any an-danitra ka nahatonga azy ho olombelona mba hahatonga antsika ho zanak'Andriamanitra.

Izany no dinam-pitiavana sy fihavanana izay tanteraka sahady ankalazaina amin'izao Alakamisy masina izao. Niveloman'i Jesoa tanteraka ny Zoma masina tamin'ny fanolorany ny tenany tamin'ny lakroa ho fankatoavana an'Andriamanitra Rainy ary nanolorany tena mba ho ao anatin'ny dinam-pitiavana sy fihavanana izany ihany koa isika tsirairay izay mandray azy. Tafatsangan-ko velona izy ka isika koa dia miala amin'ny fahafatesana vokatry ny fahotana mba hiombona Aminy ao amin'ny fiainana vaovao izay maha zanaka antsika.

Ry Kristianina havana, ny vakiteny amin'izao Alakamisy masina izao dia mampisantatra antsika amin'ny fiainana miaraka amin'i Kristy. Ny vakiteny voalohan'ny bokin'ny Eksaody mampatsiahys antsika ny nataon'i Moizy rehefa afaka tamin'ny fanandevozan'ny tany Ejpta ny vahoakan'israel. Hanomanany ny fanafahana azy dia natoron'i Moizy ny vahoaka ny tokony hatao : izay rehetra nametraka tamin'ny tolàna ny ran'ny zanak'ondry dia nahazo ny famonjena. Isika koa raha mandray ny batemy vokatry ny nanoloran'i Jesoa ny tenany ka nandatsahany ny rany izay fanekekem-pihavanana vaovao dia afaka amin'ny fanandevozan'ny fahotana.

Ny tenin'i Jesoa no ampiatsiahivin'i Md Paoly amintsika amin'ny vakiteny faharoa : "Toy izany koa, nony efa nihinana, dia hoy izy: "Kalisy fanekena vaovao amin'ny Rako ity; manaova izao ho fahatsiarovana Ahy, isaky ny misotro ianareo". Fa isaky ny mihinana ity mofo ity sy misotro amin'ity kalisy ity ianareo, dia manambara ny fahafatesan'ny Tompo mandra-piaviny ». Izay mandray an'i Jesoa dia miditra amin'ny fanekekem-pihavanana vaovao ka miombona Aminy tanteraka.

Tsy hoe manao teatra isika raha manantateraka ny fihetsika sy ny niainan'i Jesoa tamin'ny fiarahany nisakafo tamin'ny mpianany fa noho ny asan'ny Fanahy masina dia miombona tanteraka Aminy isika ary indrindra fa ny fankalazana ny Alakamisy masina dia efa manambara ilay iainan'i Jesoa ny Zoma masina. Toy izany koa ny fanehoana ny fansana tongotra mandritra ny lamesa amin'izao Alakamisy masina izao. Tahaka ny ampianarin'ny Evanjely antsika androany dia mifanasa tongotra isika samy isika, mifanasa ny lotontsika rehetra, entanin'ny fitiavan'i Jesoa isika ka mifanompo, mifanatsara. Izany no fiainantsika, izany ny fidiran'I JESOA AO JEROSALEMA, miditra amin'ny fiainantsika izy ka isika koa miezaka manasoa izay manodidina antsika ary manasoa koa ny tontolo iainana izay tranobe

iombonantsika it, amin'izay dia hifanaja tokoa isika ka hiala amin'ireny fiainana manapotika antsika ireny. Ny mahatonga ny fiainantsika potika dia isika mifanaratsy, tsy mitady izay hahasoa ny hafa isika, tsy mitady ny soa iombonana isika, toy izay hifanasa tongotra sy hifanasoa isika dia mifanapotika fa noho ny fitiavan-tena sy ny fialonana.

Raha mankalaza an'izao Alakamisy masina izao àry isika dia aoka hiditra amin'ny fiainantsika tokoa i Jesoa, ho mpiara-belona amintsika tokoa i Jesoa. Izy ilay mpampianatra dia nanaiky nanasa ny tongotry ny mpianatra mba hahasoa sy hahatsara ary hanome ohatra velona ho antsika. Aoka àry isika ihany koa mba samy vonona hifanasoa, hifanatsara ka hiala amin'ireny fomba tsy mety ireny dia ny fitiavan-tena, ny fialonana izay hanapotehana ny hafa.

Ry Jesoa Tompo ô, nanome ohatra velona ho anay lanao ilay mpampiananatra nanaiky nanasa ny tongotry ny mpianatralo, izany koa ny lèlana hitondra anay amin'ny famonjena. Tianay ho soa sy ho tsara ny fiainanay ka aoka ho vonona hifanasa tongotra izahay, hitady izay hahasoa ny hafa. Ampio àry izahay ry Jesoa zokinay ô, ampianaro izahay mba hifanasoa. Amen

Mompera Arseveka Mgr Benjamin Ramaroson